



Nos Prikichi

KOOPERATIVA EMPLEADONAN PETROLERO

DEN E EDISHON AKI:

KONTENIDO

- Presidente na Palabra
- Resultado di elekshon
- Plan edukashonal 2008
- Fundeshi di koperativa
- 2 di yüli 2008: Dia di Himno i Bandera di Kòrsou
- Tasa di interes
- Desaroyo ekonómiko na Kòrsou
- Konferensha mundial i Karibense
- Huki spiritual
- Vakashon!
Kon pa entretené nos muchanan sin kibra bo budget
- Family Indemnity Plan
- Bon biní na miembro nobo
- Reunion General
- In Memoriam
- Páginu pa Mucha
Bon komportashon



Orario di Ofisina

Djaluna - Djabièrnè:
08-00 - 17:00 or'
(NON-STOP)

Presidente na Palabra

Kerido Sosio,

Esaki ta e di dos edishon di “Nos Prikichi” pa aña 2008 i e di dos kuartal di e aña koriente a kaba di terminá. Tempu ta pasa masha rápido i ta p'esei ta hopi importante pa hasi bon uso di e tempu ku nos tin disponibel.

E edishon aki ta kontené algun artíkulo i tópiko masha interesante. Tambe Direktiva ta hasi uso di e oportunitat pa informá sosionan tokante e aktividatnan ku ta tumando lugá.

Na prinsipio di aña a terminá e plan di maneho 2008 i a kuminsá ku eheshon di e ophetivonan. Un di e promé akshonnan tabata redukshon di e tasa di interes riba fianza. E proseso aki ta importante pa asina konstantemente mehorá e benefisionan pa nos sosionan.

Tambe a kuminsá ku e programa di edukashon pa sosionan. Direktiva a fiha komo un di e ophetivonan importante pa logra ku por lo ménos 20% di e sosionan nobo partisipá na e kurso básiko di koperativa. Nos ta pidi tur e sosionan aki pa na momentu ku nan risibí e invitashon, pa nan hasi nan máksimo esfuerso pa partisipá na e kurso riba e fecha indiká. Lo dediká atenshon spesial na e proseso di kompra kolektivo pa amplia esaki mas tantu posibel. Asina aki Direktiva ta sigui ehekutá tur e ophetivonan pa e aña aki.

Aña pasa Direktiva a organisá un sondeo bou di miembresia pa midi prinsipalmente kon e grado di satisfakshon ta pa ku KEP i tambe pa optené komentario tokante deseonan di sosionan. E resultado di e enkuesta a demonstrá ku 92.5% di sosionan ta kontentu ku e servisio di KEP, kompará ku 89.5% den e enkuesta anterior. Di e komentarionan ku a ser hasí den e enkuesta a resaltá e petishon pa modifiká e tasa di interes i pa mehorá e posibilidatnan di kompra kolektivo.

Direktiva ke gradisí tur sosio ku a yena e formulario di e enkuesta i tambe ke ekspresá su satisfakshon ku e resultado. Manera mensioná anteriormente, ya Direktiva a atendé e asunto di tasa di interes i a kuminsá ku e asunto di kompra kolektivo.

Den e edishon aki di Nos Prikichi tin un artíkulo masha interesante tokante e desaroyo ekonómiko di Kòrsou. Direktiva ta rekomendá sosionan pa lesa e artíkulo ku atenshon i tambe e rekomendashonnan. Desaroyonan mundial ku ta tuma lugá lo afektá e poder di kompra di nos tur. Ta hopi importante pa nos tuma e medidanan adekuá na tempu pa aliviá e efektonan. KEP, komo koperativa, lo ta un ayudo grandi pa nos sosionan i lo dediká hopi atenshon na e tema aki.

Manera bo por mira, direktiva di bo koperativa ta sigui traha sin kansa riba nos plannan pa e aña aki pa mehoransa kontinuo di nos koperativa.



Presidente Ethlyn Hanley:
“Plan di Maneho ya ta den eheshon.”

Presidente Ethlyn Hanley

Resultado di Elekshon

Durante di e promé Reunion General pa e aña aki, ku a tuma lugá dia 18 di mei último na Universidat Nashonal di Antia, sosionan a elegí miembronan nobo pa e diferente órganonan statuario. E reunion aki a konta ku presensia di 109 sosio. Apesar ku e tabata bon bishitá semper ta bon pa kòrda miembronan pa asistí na Reunion General i hasi uso di nan derechi di vota. E personanan ku a keda elegí durante di e Reunion General aki ta Lionel Sint Jacobs komo tesorero, Donald Ogenia i Gregory Lourens komo miembro di Direktiva i Edseline Francisca i Richinel Rhuggenaath komo miembro di Hunta di Komisario i Eric Hatona komo miembro di Komishon di Krédito.

Nos Prikichi kier felisitá e miembronan aki ku nan funshon nobo. Nos ta konta ku boso aporte lo yuda pa engrandesé logronan di e koperativa.



PLAN EDUKASHONAL 2008

Manera nos a splika bo den e edishon pasá, KEP ta buska pa yuda sosionan den kresementu i desaroyo di nan konosementu den koperativa.

Abo komo sosio ku ta interesá pa amplia konosementu tokante koperativa i ke sa mas di tópikonan relevante pa bo propio desaroyo, por hasi bon uzo di oportunidatnan ku KEP ta ofresé bo pa ku treinen i charlanan. Ku e seshonnan aki direktiva di KEP ke logra kumpli ku su deber di fomentá konosementu básiko di koperativa i kontinuamente eduká sosionan ampliamente riba kambio i téknikanan di koperativa. Pues skohe pa un desaroyo propio konstante i probechá di e seshonnan ku ta salí for di nos plan di edukashon.

Den e promé parti di aña ya tabatin algun seshonnan kaminda miembronan por a asistí na treinen i charlanan riba tópikonan relevante. Den aprel tabatin un charla tokante di impuesto kaminda a asistí un kantidat 30 miembro. Durante di e charla aki partisipantenan a haña e oportunidat pa sa mas tokante kon pa dil ku impuesto den nan finansa. Banda di esaki tabatin tambe un treinen di kon pa tene un debate, presentá pa señor Harold Anastatia. Den e edishon aki di Nos Prikichi, sosionan por haña algun informashon tokante e tópiko ku a keda tratá. Na e treinen aki a asistí 7 hende. Otro seshon interesante tabata esun di señor Alvin (Roro) Rodriguez ku a duna miembronan mas konosementu riba tarea i responsabilidatnan di órganonan statuario. Durante di e treinen aki tambe tabatin 6 partisipante. E treinen aki lo tuma lugá atrobe na luna di novèmber. Mas abou den artíkulo aki por haña informashon di e siguiente seshonnan.

Kurso, treinen i charlanan ku ainda ta pendiente pa 2008 ta:

Kurso/Treinen den 2008

- **Téknika pa un reunion efektivu**
Fasilitadó: Jefka Alberto
Tayer di 16 ora, dividí den 4 seshon di 4 ora di 09:00 pa 13:00 or'
Djasabra Yüni 7, 14, 21, 28, 2008
- **Konsientisashon di Koperativa**
Fasilitadó: Alvin (Roro) Rodriguez
Tayer di 6 ora, dividí den 2 seshon di 3 ora di 18:00 pa 21:00 or'
Djársan Yüni 11 i 18, 2008
Djársan Ougùstùs 20 i 27, 2008
Djársan Sèptèmber 17 i 24, 2008
Djársan Novèmber 26 i Desèmber 3, 2008
- **Tarea i responsabilidat di órganonan statuario**
Fasilitadó: Alvin (Roro) Rodriguez
Tayer di 6 ora, dividí den 2 seshon di 3 ora di 18:00 pa 21:00 or'
Djársan Novèmber 5 i 12
- **Kon ta manehá sèn (pa hóben)**
Fasilitadó: Earl Balborda
Un seshon di 4 ora di 09:00 pa 13:00 or'
Ougùstùs 2, 2008

Charlanan den 2008

- Yüli 25: Charla pa penshonado 18:00 - 20:00 or'
- Ougùstùs: Charla riba Herensia 19:00 - 21:00 or'
- Òktober: Charla Médico (Tópiko Kanser) 19:00 - 21:00 or'



Sosionan por pasa na ofisina i inskribí nòmber pa e seshonnan ku sosio ta deseá di partisipá na dje. Tur seshon ta grátis. Tuma nota ku ta bon pa inskribí na tempu mirando ku mester tin un mínimo di 6 inskripshon, si no e seshon lo keda kanselá.

Fundeshi di koperativa i reunion i debate



Den nos edishon anterior nos a konta bo algu di fundeshi di koperativa, e biaha aki atrobe nos ta bai para ketu riba un parti importante di koperativa. Den nos koperativa un di e órganonan mas importante ta nos Reunion General di miembronan. Ta p'esei ta bon pa e reunion kana segun reglanan stipulá pa ku reunionnan manera Reunion General, Asamblea, Parlamentu òf Kongreso. E reglanan aki yama Prosedura Parlamentario. Pero kua e reglanan aki ta eksaktamente?

Reunion

Na promé lugá ta bon pa definí eksaktamente kiko ta un reunion. Un reunion ta un enkuentro di dos òf mas persona den akshon pa interkambiá informashon, hiba debate (dialogá, deliberá), diskutí proposishonnan i/o tuma desishon riba sierto asunto(nan). Loke ta relevante pa un reunion komo tal ta e kantidat di partisipante, e lokalidat di e reunion, konvokashon pa reunion, agènda di reunion, quorum di miembronan, presidente di e reunion, partisipashon di e miembronan, desishonnan tuma den reunion i nótulonon di e reunion. Si tur esakinan tuma lugá, por papia di un reunion segun Prosedura Parlamentario.

Moshon

Un área ku ta di sumo balor pa e Reunion General i ku ta kai direktamente bou di reglanan di Prosedura Parlamentario ta moshonnan. Un moshon ta un proposishon ku ta bini di un òf mas miembro den un reunion i ta kontené sea un deseo òf un deklarashon. Entre e moshonnan mas konosí por distinguí, kuater klase prinsipal.

1. moshon prinsipal òf original
2. moshonnan supsidario
3. moshonnan privilegiá
4. moshonnan insidental (òf imprevisto)

Un moshon prinsipal ta esun kaminda e asunto òf plan prinsipal ku na dado momentu, riba proposishon di un miembro, un reunion òf asamblea ta atendiendo. Un moshon supsidario tin komo meta pa afektá e moshon prinsipal. Pa e motibu aki e moshonnan supsidario tin preferensha den tratamentu riba e moshon prinsipal. Moshonnan privilegiá tin di haber ku e reunion òf asamblea mes i p'esei e moshonnan aki ta haña tur preferensha di tratamentu. Na momentu ku determiná ku un moshon ta unu di berdadero privilegio, ta pasa mesora pa votashon i no ta pèmití debate. Moshonnan insidental mas bien ta trata e ambiente i e konsiderashonnan rondó di e moshon prinsipal, sin ku nan ta apelá direktamente na kontenido dje moshon. E moshon aki ta haña preferensha di tratamentu riba e moshon prinsipal.

Semper ta bon pa ora den un reunion ta trata un moshon, pa tene kuenta ku e siguiente aspektonan:

1. Esun ku ta presentá e moshon por interumpí un miembro na palabra?
2. E moshon mester keda sekundá?
3. E moshon ta debatibel?
4. E moshon por keda amendá?
5. Ki sorto di voto i ki kantidat ta rekerí?

Por mira ku moshonnan entre otro ta forma e base pa bon kondukshon, pa efektividat i efisiensia di un reunion.

*Informashon saká for di 'Kon ta hiba un debate'
Skibí pa H. Anastatia*



2 DI YÜLI 2008: DIA DI HIMNO I BANDERA DI KÒRSOU

Yunan di Kòrsou, ban pone man na obra, ban kambia aktitut, ban stima nos pais i defendé ku alma i kurpa. Awor ku nos ta riba ruta pa un Pais Kòrsou outónomo den reino, mas ku nunca nos ta bisa: Biba Kòrsou, biba nos bandera!



TASA DI INTERES PA FIANSA AWOR TA 6%

Sosio, bo a nota si, no? KEP su tasa di interes pa tur fiansa nobo i kambio di fiansa ta 6% so so! Bo ta mira; bo kooperativa ta kòrda riba bo!

Desaroyo ekonómiko na Kòrsou

“Kiko mi por spera di ekonomia?”

Kòrsou a konosé den añanan ochenta un reseso pisá den ekonomia. E lucha tenas di siudadanonan pa bringa desempleo, oumento di preis i falta di rekursu a hiba na resultadonan manera pobresa, kriminalidat i emigrashon. Nos pais, pueblo Kòrsou, a pasa den krisisnan pisá ku a trese kuné desaroyonan negativo.

Awendia nos ta den un estado di 'wait-and-see'. Nos tur ta warda pa mira kiko ta bai pasa. Miéntas ku di un banda kos ta pinta di ta bai drecha, di otro banda desaroyonan ekonómiko ta mara stròp di e konsumidó.

Aña pasá, na 2007 a habri na Kòrsou alrededor di 2.500 kupo di trabou riba diferente área di profeshon. Perspektivanan ta haltu, mirando kresementu den turismo den e último periodonan. Banda di esaki, e konstrukshon di mas ku 300 kamber di hotèl lo ta di un inmenso balor agregá den e kresementu di ekonomia di Kòrsou. Tambe tin proposishonnan riba mesa pa ku saneamentu di debenan astronómiko di gobièrnunan di Kòrsou i Antia. Leu ayá por kuminsá papia di adelanto, òf en todo kaso di un prospekto pa mehorashon.

Pero di otro banda desaroyonan mundial tin efektonan drástiko riba e mesun ekonomia alentador. Subida di preis pa barí di petroli ta kousando hopi kambio den nos komunidad. No solamente produktonan direkto manera

gasolin i diesel ta oumentá na preis, pero tambe e produktonan indirekto manera awa i koriente. Mas ainda por sinti e efekto den komersio kaminda doñonan di pakus i tienda ta subi preis pa motibu di inkalkulashon di e oumento aki. Esaki ta resultá den un subida di preis di gasolin, awa, koriente, komestibel i otro produktonan di uso: un efekto tremendo riba nos tur su pòtmòni!

Nos ta kla pa e kambionan kontradiktorio aki den nos ekonomia? Ta importante pa nos sigui tur desaroyo di aserka i ahustá nos mes i nos estilo di bida na esaki. Ku subida di gastu nos tin di tene kuenta ku e diskrepansha ku lo surgi den nos presupuesto mensual i anual. Ta esensial pa nos ta prepará pa kambionan den koyuntura ekonómiko.

P'esei ta nesesario pa bo planeá bo presupuesto di tal forma ku bo ta evitá na hasi gastunan hopi grandi sin tin sigur di un 'fall back', pues algu ku bo por konta riba dje si situashon bai robes; un sèn di spar por ehèmpel. Kòrda ku mes bon ku kos por kana, asina tambe e por bai robes. Nos mester keda fiha bista riba kambionan grandi riba nos isla, teniendo kuenta ku e kambio aki ta nifiká tambe kambio den nos propio bida i manera di manehá nos finansa. Pues sea prepará i manehá gastu, di akuerdo ku e situashon.



Kontinuashon di pág. 4

- Semper yena bo tanki di gasolin mainta trempañ, ya ku e ora ei temperatura di tera ainda ta friu. Kòrda ku pòmpan di gasolin tur tin nan tankinan bou di tera. Kiermen mas friu tera ta mas denso e gasolin lo ta. Ora tera ta kayente e gasolin ta ekspandé, konsekuentemente bo ta haña ménos gasolin.
- Ora bo ta yena gasolin, e man di e pòmpan tin tres midí: lihé, ménos lihé i pokopoko. Nunka usa e midí mas lihé di yena gasolin, sino usa esun mas pokopoko, di e manera aki e vapornan ku ta wòrdu kreá ora bo ta yena gasolin ta mínimo i atrobe bo ta haña mas gasolin.
- Otro rekomendashon ta pa bo yena bo tanki semper ora e ta na mitar, ya ku mas gasolin bo tin den bo tanki ménos airu ta akumulá den bo tanki, konsekuentemente mas gasolin bo ta haña pa bo sèn.
- Nunka yena bo tanki ora e trùk di gasolin ta yenando tanki di e pòmpan, pasobra na e momentu ei tur e gasolin den e tanki di e pòmpan ta wòrdu mesklá i tur shushi ku tin den e tanki ta kuminsá move, konsekuentemente e porkeria por bin kaba den bo tanki di outo.
- Pa spar koriente ta bon pa kumpra lampinan ku ta yuda spar e konsumo di KWH.
- Evitá di habri frishidèr mas tantu ku ta nesesario.
- Ora di laba tayó òf paña, usa awa na un manera efektivu dor di yena bakinan ku awa enbes di habri kranchi kada bes.
- Despues di hasi uso di aparatonan eléktriko, en partikular den kushina, ta bon pa paga esakinan mesora pa evitá gastu di koriente innesesario.
- Kòrda ku tur aparato ku ta para riba 'stand by' ta hala koriente tiki-tiki (televishon, dvd player, èts). Un alternativa ta pa saka e aparato for di koriente ora e no ta den uso.
- Aparatonan ku mester kenta pa nan uso, manera heru di strika, toaster oven, rice cooker ta ranka hopi koriente. Kaminda ta posibel, usa esakinan ménos.
- Usá aparatonan pa keinta awa, solamente ora esaki ta nesesario. Si e awa di kranchi ta na un nivel di temperatura medio, mihó usa esaki.

Konferensha mundial i Karibense

Komo miembro di un kooperativa semper ta bon pa sigui desaroyonan internashonal den e área di koperativismo. Organisashonnan mundial i Karibense, riba un base anual ta organisá eventonan pa tur esnan ku ke sa mas òf ku ke kontribuí na desaroyo di koperativismo, ku nan konosementu i eksperensia. Pa e motibu aki nos ta duna bo informashon pa dos konferenshanan benidero di CCCU (Caribbean Confederation of Credit Unions) i WOCCU (World Organization of Credit Union).

CCCU

51st Annual Convention & 37th Annual General Meeting
di 29 di yùni pa 2 yùli 2008: Registrashon - US\$ 950.00 pa persona
Sunset Jamaica Grande Resort & Spa; US\$ 220 double pa anochi (all-inclusive)
Ocho Rios, Jamaica

WOCCU

Konferensha mundial na Hong Kong
Di 13 di yùli pa 16 di yùli 2008
Registrashon - US\$ 1.195.00 pa persona
Hotel: Grand Hyatt Hong Kong; Renaissance Harbour View Hotel





Huki spiritual

KEP ke yuda su sosionan den e áreanan importante den nan bida, pues esun spiritual tambe, pasó 'after all' hendé no ta biba di pan so. P'esei nos a habri un huki spiritual den Nos Prikichi pa duna bo e alimento aki.

Pa pensa riba dje:

Si e yerba den kurá di bo bisiña ta parse mas bèrdè, bo por ta sigur ku su resibu di awa ta mas haltu tambe.


Siñansa:

No biba pa plaka so, keda kontentu ku loke bon tin. Dios mes a bisa: Mi no ta laga bo nunca bandoná.

Hebreonan 13:5

Vakashon!

Kon pa entretené nos muchanan sin kibra bo budget



Den temporada di fakansi bo por dibertí i disfrutá ku bo yunan sin tin mester di hasi muchu gastu.

Temporada di vakashon ta den kurpa, i ya nos muchanan a kuminsá pa e periodo kaminda nan por disfrutá sin fin. Pero tin mayornan ku si ta man na kabes pensando kon pa sòru pa un temporada di vakashon fabuloso sin hasi muchu gastu, mirando ku kosto di bida a subi konsiderablemente. Nos Prikichi tei pa yuda bo. Den e edishon aki, bo ta haña algun tep kreativo, pa asina bo entretené bo muchanan den tempu di fakansi sin kibra bo banko.

- o Organisá un trep pa parke tropikal pa bo yu i su amigunan. Parke tropikal ta kompletamente grátis i tambe tin un área spesial kaminda e muchanan por hunga. Durante di e trep aki bo mes por traha un pakete di kos pa ches pa e muchanan gasta. Pa hasi e aktividat mas edukativo pa e muchanan bo por laga nan konta bo kiko nan sa di kada animal.



- o Na parke tropikal tin tambe e posibilidat pa bai na e 'kinderboerderij' kaminda e muchanan por duna kuminda na e bestianan i siña mas di kada un. Hopi bia 'kinderboerderij' mes tambe ta organisá aktividat pa muchanan.
- o Enbes di saka hopi sèn pa biaha bai otro pais òf kisas pa keda den un hotèl karu, por hür un wikènt huis pa un òf dos siman, i bai aki ku e muchanan den temporada di vakashon. Si bo traha un programa fleksibel for di adelantá bo por hasi hopi kos dushi ku bo muchanan. Pensa por ehempel riba landamentu, barbekiú, keirumentu den naturalesa, kampvuur ets.
- o Organisá seshonnan kaminda e muchanan huntu ku amigunan por hasi obra di man, prepará kos dushi òf kushina algu fásil. Ta un bon manera pa e muchanan siña mas pero na un manera ku nan por dibertí.
- o Organisá huntu ku bo yu, un wikènt di keda drumi kaminda huntu ku su amigunan e por dibertí na kas mes. Aki nan ta haña chèns di hunga na nan antoho. Durante di e wikènt aki mes bo por organisá e seshonnan ariba menshoná.
- o Organisá un dia di 'sightseeing' kaminda bo por laga e muchanan sera konosí ku lugánan ku normalmente nan no ta paga tinu riba dje. Pensa tambe ku 'sightseeing' no ta semper bo ta hasié na outo. Bo por hasi esaki ku konvoi, riba baiskel òf na pia. Kue konvoi bai Bándabou, subi baiskel i kore den naturalesa òf kana den Punda i disfrutá di e bunitesa ku esaki tin di ofresé.

Kòrda ku no ta e kantidat di sèn ku bo ta invertí ta hasi e fakansi dushi, sino e tempu ku bo ta dediká na bo yu i e manera kreativo ku bo hinka tur kos den otro.

Jefka Martha- Alberto, sosio di KEP: 'Family Indemnity Plan' ta un seguro benefisioso p'ami i mi famia



Jefka Martha-Alberto:
"Ku e 'Family Indemnity Plan' di KEP henter mi famia ta bon sigurá."

KEP tin pa su sosionan e asina yamá 'Family Indemnity Plan'. Kiko esaki ta i kiko e ta enserá? E plan di indemnishon aki pa famia ta un forma di seguro pa entiero, ku ta duna benefisio finansiero kèsh pa yuda kubri gastunan di entiero di e miembro i òf su miembronan di famia.

'Family Indemnity Plan' ta un forma di plania pa algu ku un i tur sa ku lo sosodé sigur: esta morto. Esaki segun Jefka Martha-Alberto, miembro di e koperativa KEP for di aña 2005, kende tambe ta forma parti di e seguro aki. Yevchenka a drenta den e seguro aki for di momentu ku KEP a introdusí esaki.

"Mi a drenta den e plan di seguro aki for di òktober 2007. Mi a skohe e seguro aki pasobra e tin hopi benefisio pa mi famia. Mi ta haña perfekto ku henter mi famia por ta parti di dje. Ami por ehèmpel a skohe pa Plan D, kaminda pa solamente 72 florin mensual, ami i henter mi famia ta sigurá pa 15.000 florin kada unu. Mi por a asta inkluí mi mama den e seguro. Mi tata a keda afó solamente pasó e tin nèt 77 aña. Esaki mi a haña ideal. Si mi kompará e seguro aki ku otro opshonnan di kompanianan komersial, mi ta kere ku nos komo sosio sigur ta sali ganá. E bentaha mayó den e kaso aki ta ku e koperativa ta ofresé seguro na bienestar di abo komo sosio. E produktonan di e koperativa en todo kaso nunca ta mas karu ku esun di otro proveedor komersial. Ademas ta bon pa bo kontribuí na bo koperativa dor di hasi uso di e diferente produktonan ku e ta ofresé. P'esei banda di e plan di seguro aki, mi yunan tambe ta den e plan di spar pa mucha. I komo ku ami i esposo ta na kabes di nos propio kompania nos ta disfrutá di e seguridat di tin un instituto finansiero manera KEP ku nos por konta kuné fásilmente den kaso ku nos tin mester di un fianza personal."

Kon abo tambe por forma parti di e seguro aki?

1. Tur miembro di KEP (ku no a kumpli 76 aña ainda)
2. E miembro su kasá òf partner (ku no a kumpli 76 aña ainda)

3. E miembro su yunan natural dependiente, yunan legal, yunan adoptá òf ku e miembro ta kuida, tur ku no ta traha ainda i ku no a kumpli 26 aña ainda. Yunan ku desabilitat permanente por partisipá den e seguro aki pa henter su bida, basta e drenta promé ku e hasi 26 aña.
4. Tambe mayornan di e miembro òf di su kasá/partner (ku no a kumpli 76 aña ainda)

Pues esaki berdaderamente ta un plan pa henter famia. Úniko kos ku mester tene kuenta kuné ta ku e plan di seguro pa famia aki ta pa un máksimo di 6 (seis) persona so. Ademas, den e máksimo di 6 persona aki por sigurá 2 mayor so, sea bo mayornan, esnan di bo kasá/partner òf un di kada, pues un mayor di e miembro i un di su kasá/partner. E máksimo ku bo por sigurá ta keda 6 persona. No por sigurá mas hende pero si por ménos.

Kuater pakete

Tin kuater pakete di seguro. Promé ta mensioná e prima mensual i despues e montante ku ta paga pa kada asegurado ku fayesé:

- Plan A : Ta kosta Naf. 24 pa luna i ta paga Naf. 5.000
- Plan B : Ta kosta Naf. 36 pa luna i ta paga Naf. 7.500
- Plan C : Ta kosta Naf. 48 pa luna i ta paga Naf. 10.000
- Plan D : Ta kosta Naf. 72 pa luna i ta paga Naf. 15.000

Un seguro úniko i diferente ku ta bale la pena inskribí i partisipá den dje!

Kiko ta e bentahanan presis?

- Bo ta inskribí fásilmente, yenando un formulario na ofisina.
- Bo no tin mester kùr pa wòrdu aseptá.
- Bo por kumpra e pakete ku bo ta deseá (A, B, C òf D) pero ku tempu bo por kambia di un p'e otro segun bo nesidat òf preferensha.
- Bo ta sigurá 6 persona i si mester, bo por kambia nòmbernan di esnan ku abo a inskribí, i pone otro, sea ta pa motibu di fayesimentu, divorsio òf yunan ku hasi 26 aña, etc.
- Pagonan mensual bo ta paga na bo kooperativa dirèkt ku ta sòru pa tur e transakshonnan pa bo.
- Den kaso di claim bo ta risibí e benefisio finansiero kèsh segun bo plan den 2 dia.
- Bo por asigná un beneficiario (si Lei ta permití) pa risibí e pago si abo komo miembro fayesé.

E plan di seguro aki ya tin hopi aña ta wòrdu bendé den henter Caribe i Merka i el a resultá masha eksitoso. E ta wòrdu atministrá i sigurá pa Cuna Mutual Insurance Society, ku ta un kompania grandi di seguro speshalmente pa koperativanan. Ta e mesun kompania ku ta sigurá nos sènnan den KEP.

Direktiva ta enkurashá tur miembro di KEP pa evaluá e posibilidat di sigurá bo mes i bo famia, den un di plannan aki. Kòrda, pèrdè un ser stima ta doloroso.....kubri e gastunan di entiero no nesariamente mester ta.

BON BINÍ na miembro nobo



KEP ta orguyoso di mira kresementu den e organisashon. Mas i mas persona ta inskribí pa forma parti di nos kooperativa. Nos Prikichi ta manda un bon biní kaluroso na tur e 21 miembronan ku a drenta durante febrüari 2008 pa mart 2008. Nos famia di KEP ke pa bo sintí bo na kas!

REUNION GENERAL



Sosio Antonio Hart ta e promé persona ku a yega Reunion General 18 di mei i Direktor Suplente Kenneth Anthonij ta duné un regalitu pa su bon komportashon.

Despues di e Reunion General eksitoso di 18 di mei 2008, kaminda a skohe miembronan pa e diferente órganonan statutorio, e siguiente Reunion General pa Miembresia lo tuma lugá dia 7 di dezèmber 2008 pa atendé ku Presupuesto 2009.

Pues keda pendiente pa e fecha aki i marka esaki for di trempañ den bo agènda. Komo miembro bo presensia ta di sumo importansia durante Reunion General di miembro. Direktiva ta konta ku bo presensia!



Nos Prikichi ta un produkshon di KEP

Direktiva

- Presidente E. Hanley
- Sekretario L. Elisabeth
- Tesorero F. Candelaria
- Visé Presidente R. Felicia
- 2° Sekretario J. Maria
- 2° Tesorero R. Roosberg
- Komisario R. Marcos

Hunta di Komisario

Presidente E. Francisca

Komishon di Krédito

Presidente O. Elizabeth

Direktor di Ofisina L. Carol

Redakshon Nos Prikichi

Practical Business Solutions/

Jefka Alberto

Asistí pa Shurminia Rafaël

Orario di Ofisina

Djaluna-Djabièrnè:

08:00 - 17:00 or'

Adrès

Schottgatweg West 359

Telefòn

868-3290/869-5541/869-0054

Faks

869-3646

Wèpsait

www.kepcreditunion.org

PÁGINA PA MUCHA

Kepito

Hei amiguitunan, kon ta bai. Kepito ta saludá bo kalurosamente. Kon a bai ku tur e tareanan di skol. Nos ta spera ku boso ta hasiendo boso bèst i ku pronto nos por tende ku boso tur a bai over. Tambe Kepito lo bira hopi kontentu si e sa ku boso tabatin un bon komportashon.

Ta p'esei mes den e edishon aki nos ta bai papia un tiki mas di komportashon. Kon abo ta komportábu? Bo ta pone bo mayornan papia hopi? Ban siña i sa mas di bon komportashon.

Un bon Komportashon ta importante

Komportashon ta mashá importante. Si un mucha komportá bon, e ta haña hopi bon fruta di su manera di aktua.

Komportashon ta sali for di e manera ku bo a wòrdu disipliná na kas. Manera nos a siña kaba, disciplina ta ora bo mayor siña bo algu.

Komportashon ta ora bo praktiká manera mester ta e loke bo mayornan siña bo. Komportashon ta enserá pues tende di bo mayornan i sigui e reglanan di disciplina ku nan a siña bo di dje.

Un bon komportashon ta hopi importante pasobra e ta habri hopi porta pa bo. Si bo ta komportá bon na skol, bo yùfrou semper lo skohe abo pa hasi kosnan 'leuk'.

Si na kas bo komportá bon, bo mayornan semper lo tin gana di hasi kos 'great' ku bo pasobra nan sa ku bo ta komportá. Ademas di tur esaki un bon komportashon ta bon pa bo mes i e manera ku hende ta mira bo.

Mami i papi ta kontentu ku bo, basta bo komportá bo



Ta bon tambe si bo tin un bon komportashon aworakí. Pasobra esaki ta preparábu pa futuro. Pa ora bo tin di bai buska un trabou òf ora bo tin ku bai skol haltu. Dor di sigui e reglanan di disciplina ku bo a siña na kas for di aworakí ta muchu mas fásil pa bo hasi nan ora bo ta bo so i bo mayor ni bo yùfrou no tei pa korigíbu.

No laga ningun hende influensia bo komportashon. Sigur no si nan ta siña bo hasi kos otro for di loke bo mayornan ta edukábo na kas. Bo komportashon mester muestra e kosnan bon ku mami i papi ta bisa bo pa hasi òf no hasi tur dia di nobo. Kòrda ku esaki ta bon pa bo mes.

Ke men, komportá bon na kas, na skol, na bo klup, na padvinderij i tur kaminda ku bo bai.

Kues tokante komportashon

Hepa abo sigur tin hopi bon komportashon. Bo ke tèt esaki? Awèl hasi e tèt ku Kepito a prepará pa bo i wak si di bèrdat bo ta bon mucha. Eksito!

Ki ora mi mester bai drumi?

- Ora mi haña soño
- Despues di 10 bia ku mami a manda mi drumi
- Mi sa ku tur dia mi mester drumi och'or. Mi ta riba kama promé ku esei



Kiko mi mester hasi ora ku mi no gusta un kuminda?

- Pidi mami saka ménos pa mi
- Bisa ku e kuminda ta smak malu
- Keda sin kome



Si mi papa taha mi di hasi algu. Mi ta:

- Traha kara rabiá
- Hasi manera mi no a tende
- Stòp mesora i pidi despensa

Si yùfrou ke pa mi sinta ketu den klas. Mi ta:

- Djis kontu mi amiga algu mas promé ku mi keda ketu
- Mi ta stòp di papia pasobra mi ta stroba otro muchanan
- Mi ta rabiá ku yùfrou i hasi ònbeskòp



Kiko mi ta hasi ku mi kos di hunga nan ora ami i mi bisia kaba di hunga?

- Mi ta laga nan plama pasobra tòg mami ta hisa nan
- Mi no tin gana di hisa nan pasobra tòg no ta ami so a plama nan
- Huntu ku mi bisia mi ta piki tur kos i warda nan nèchi pa otro bia

Ora mi ta na padvinderij i mi lider bisa mi algu ku mi no a gusta. Mi ta:

- Papia mahoso kuné
- Mi ta skucha loke e tin di bisa mi i purba komportá mi mihó
- Kana bai lag'é

Si mi no haña algu ku mi ke. Mi ta:

- Rèk lep i traha kara fadá
- Yora sin stòp te ora mi hañ'é
- Komprondé ku kisas mi no por a hañ'é e biaha aki, porta e tabata un tiki duru pa mi mayornan aworakí

